

**Ekkert er  
foreldrum  
dýrmætara en  
velferð barna  
þeirra.**



# Stoðir í skóla- starfi

## Foreldrar bera höfuðábyrgð á uppeldi og menntun barna sinna

Ýmsar rannsóknir benda til þess að þegar foreldrar taka virkan þátt í skólastarfi er frammistaða barna þeirra betri, sjálfstraustið meira og viðhorfið jákvæðara.



## Skólaráð

Með gildistöku laga nr. 91 um grunnskóla frá 12. júní 2008 koma skólaráð í stað foreldraráða. Skólaráð er samráðsveitvangur skólastjóra og skólasamfélags um skólahald. Skólaráð tekur þátt í stefnumörkun fyrir skólann og mótun sérkenna hans. Skólaráð fjallar um skólanámskrá skólans, árlega starfsáætlun, rekstraráætlun og aðrar áætlanir um skólastarfið. Skólaráð skal fá til umsagnar áætlanir um fyrirhugaðar meiriháttar breytingar á skólahaldi og starfsemi skóla áður en endanleg ákvörðun um þær er tekin. Skólaráð fylgist almennt með öryggi, aðbúnaði og almennri velferð nemenda.

Skólaráð skal skipað níu einstaklingum til tveggja ára í senn, tveimur fulltrúum kennara ásamt einum fulltrúa annars starfsfólks í viðkomandi skóla, tveimur fulltrúum nemenda og tveimur fulltrúum foreldra, auk skólastjóra sem stýrir starfi skólaráðs og ber ábyrgð á stofnun þess. Skólaráð velur að auki einn fulltrúa grenndarsamfélags til að sitja í ráðinu eða viðbótarfulltrúa úr hópi foreldra. Auk þess skal skólastjóri boða til sameiginlegs fundar skólaráðs og stjórnar nemendafélags að lágmarki einu sinni á ári. Sjá nánar reglugerð um starfsemi skólaráða á heimasíðu hvers skóla.

Mikilvægt er að starf skólaráðsins einkennist af opnum og jákvæðum samskiptum, góðum samstarfsanda, uppbyggilegri og málefnalegri gagnrýni og hvatningu. Til að skólaráð geti sinnt hlutverki sínu er mikil-

vægt að fulltrúar þess séu í nánu samstarfi við bakland sitt. Fulltrúar foreldra í skólaráði þurfa að vera í nánnum tengslum við stjórn foreldrafélags viðkomandi skóla, bekkjarfulltrúa og aðra foreldra. Þeir þurfa að geta miðlað upplýsingum um starfið og vera móttækilegir fyrir ábendingum frá öðrum foreldrum. Fréttabréf skóla og/eða foreldrafélaga eru mikilvæg í þessu sambandi en ekki síður heimasíður skóla. Hægt er að fara margar leiðir til að styrkja tengsl fulltrúa foreldra í skólaráði við foreldrahópinn.

Nauðsynlegt er að fulltrúar foreldra í skólaráði, stjórn foreldrafélags og bekkjarfulltrúar hittist nokkrum sinnum á ári til að skiptast á skoðunum og miðla upplýsingum.

### Á heimasíðu grunnskóla þurfa að vera eftirfarandi upplýsingar:

- Nöfn, netföng, heimilisföng og símanúmer fulltrúa foreldra í skólaráði.
- Starfsáætlun vetrarins þar sem fram kemur hvað fyrirhugað er að ræða í skólaráðinu á hverjum tíma.
- Fundartímar - dagskrá fundar skólaráðs fyrir hvern fund.
- Fundargerðir - ekki seinna en þremur dögum eftir fund.
- Leiðbeiningar til foreldra um hvernig þeir geti borið sig að við að koma jákvæðum og neikvæðum ábendingum um skólastarfið á framfæri.

## Foreldrafélög

Foreldrafélög eru nú lögbundin í kjölfar gildistöku laga nr. 91 frá 12. júní 2008. Hlutverk foreldrafélaga er að styðja skólastarfið, stuðla að velferð nemenda og efla tengsl foreldra, bæði innbyrðis og við skólann. Hlutverk þeirra er jafnframt að skapa vettvang fyrir samstarf og samstöðu meðal foreldra. Góð samskipti foreldra auðvelda samráð og samstöðu í uppeldinu.

Stjórn foreldrafélags er kosin á aðalfundi sem æskilegast er að haldinn sé að vori. Foreldrafélag hvers skóla setur sér starfsreglur þar sem m.a. er kveðið á um kosningu í stjórn félagsins og kosningu fulltrúa foreldra í skólaráð.

Stjórnin mótastefnu og áherslur í starfi í samráði við skólastjórnendur, bekkjarfulltrúa og nemendafélag.

Markmið starfsins er að stuðla að vellíðan nemenda og bættum námsárangri með því að auka samskipti foreldra og styrkja skólabraginn. Stjórnin sér til þess að verkefnum sé skipt milli foreldra þannig að sem flestir taki þátt í undirbúningi og framkvæmd a.m.k. eins verkefnis yfir veturinn.

Einn mikilvægasti hluti starfs foreldrafélaganna er uppbygging bekkjarstarfsins en það er einn besti samráðs- og samstarfsvettvangur foreldra í uppeldinu. Í þessu starfi gegna bekkjarfulltrúar afar mikilvægu hlutverki. Markmið starfsins er að stuðla að samstarfi og samskiptum nemenda, foreldra og kennara. Æskilegt er að bekkjarfulltrúarnir, kosnir af foreldrum, séu tveir í hverjum bekk/hóp. Þeir gegna hlutverki verkstjóra sem hafa jákvæða hvatningu að leiðarljósi. Þeir halda utan um dagskrá sem er ákveðin á sameiginlegum fundi foreldra í bekknum að undangenginni athugun á viðhorfum og óskum barnanna.

Bekkarfulltrúar eru jafnframt tengiliðir bekkjarins við foreldrafélag og fulltrúa foreldra í skólaráði viðkomandi skóla.

### Á heimasíðu grunnskóla þurfa eftirfarandi upplýsingar að koma fram:

- Nöfn, netföng, heimilisföng og símanúmer stjórnarmanna foreldrafélags og bekkjarfulltrúa.
- Starfsáætlun foreldrafélagsins, viðburðir, bekkjarfulltrúafundir.
- Fundartímar stjórnar og fundargerðir.
- Upplýsingar um skipulag foreldraróltis.

## Samstarf um barnið þitt

Í Aðalnámskrá grunnskóla (1999) segir að samstarf skóla og heimila eigi að vera á þremur sviðum, samstarfið um skólann sem stofnun, samstarfið um einstaka hópa eða bekki og loks samstarfið um hvert einstakt barn og skuli megin áherslan vera á síðastnefnda þáttinn.

Allir geta verið sammála um að ekkert sé foreldrum dýrmætara en velferð barna þeirra og fjöldi rannsókna segir okkur að það séu óumdeilanlega foreldrarnir sem hafi mest áhrif á líf barnanna þ.á m. nám og líðan. Ábyrgð foreldra er því mikil. Góðir foreldrar láta sig varða um allt sem lýtur að velferð barna sinna og eiga hlutdeild í öllum mikilsverðum ákvörðunum sem snerta barnið. Það á einnig við um starf barnsins í skólanum. Einn veigamesti stuðningsaðili foreldra í uppeldi og menntun barnsins er skólinn. Auk vaxandi mikilvægis menntunar hefur skólasamfélagið umtalsverð áhrif á félagslega stöðu og þróun sjálfsmyndar barnsins. Velferð barnsins verður best tryggð þegar hinir fullorðnu standa saman um hagsmuni barnsins og stefna í sömu átt. Það veitir barninu aukið öryggi að finna gagnkvæmt traust og virðingu milli hinna fullorðnu og samræmi í gildum og væntingum heima fyrir og í skólanum.

Eðlilegt er að samstarf foreldra og kennara snúist um markmið og inntak námsins, kennsluhætti, heimanám, samskipti, líðan og hegðun. Gott samstarf einkennist af gagnkvæmum upplýsingum um stöðu barnsins, samræðu,

samvinnu þar sem stefnt er að sameiginlegu markmiði sem báðir/allir aðilar taka ábyrgð á. Í samstarfinu er kennarinn leiðtogi á jafnræðisgrunni þar sem foreldrar hafa réttindi jafnt sem skyldur. Markmið samstarfsins er velferð barnsins þíns.

### Til að styðja barn þitt getur þú :

- Sýnt áhuga á starfi barnsins og líðan í skólanum með því að spyrja það
- Hlustað á barnið
- Hjálpað barninu til að leita lausna ef upp kemur vandi
- Notað þau tækifæri sem gefast til að koma í skólann og kynnst reynsluheimi barnsins
- Hvatt barnið til að gera sitt besta og styðja það eftir þörfum
- Verið vakandi fyrir því sem barnið gerir vel og hrósa því
- Talað jákvætt um nám, samskipti og starfið í skólanum
- Aflað upplýsinga frá skólanum ef eitthvað er óljóst
- Veitt kennaranum upplýsingar sem komið geta barninu að notum
- Kynnt þér upplýsingar um starf bekkjarins/nemendahópsins og skólans
- Leitað leiða til að kynnst skólafélögum barnsins og foreldrum þeirra

# Þjónustumiðstöð í hverfinu þínu

Stuðningur og ráðgjöf við nemendur, foreldra og grunnskóla

## Þjónustumiðstöð Vesturbæjar, Vesturgarður

Hjarðarhaga 45-47  
sími 411 1700  
vesturgardur@reykjavik.is

## Þjónustumiðstöð Miðborgar og Hlíða

Skúlagötu 21  
sími 411 1600  
midborg.hlidar@reykjavik.is

## Þjónustumiðstöð Laugardals og Háaleitis

Síðumúla 39  
sími 411 1500  
laugardalur.haaleiti@reykjavik.is

## Þjónustumiðstöð Grafarvogs og Kjalarness, Miðgarður

Langaríma 21  
sími 411 1400  
midgardur@reykjavik.is

## Þjónustumiðstöð Breiðholts

Álfabakka 12  
sími 411 1300  
breidholt@reykjavik.is

## Þjónustumiðstöð Árbæjar og Grafarvogs

Bæjarhálsi 1  
sími 411 1200  
arbaer@reykjavik.is

[reykjavik.is](http://reykjavik.is)  
[grunnskolar.is](http://grunnskolar.is)  
[samfok.is](http://samfok.is)

Samband foreldrafélaga og foreldraráða  
í grunnskólum Reykjavíkur  
samfok@samfok.is  
Suðurlandsbraut 24  
sími 562 7720

- Ráðgjöf og upplýsingamiðlun til foreldra
- Námskeið fyrir bekkjarfulltrúa, stjórnir foreldrafélaga og skólaráð
- Fulltrúi foreldra grunnskólabarna í menntaráði Reykjavíkur

Bæklingurinn er unninn í samvinnu SAMFOKS, Menntasviðs Reykjavíkur og Þjónustumiðstöðvar Breiðholts. Hann inniheldur upplýsingar um samstarf foreldra og grunnskóla. Bæklingnum er dreift til foreldra grunnskólanemenda í Reykjavík.



Reykjavíkurborg  
Menntasvið



Reykjavíkurborg  
Þjónustumiðstöð Breiðholts

**Mikilvægt er að  
foreldrar leggi  
sitt af mörkum  
til að gera gott  
skólastarf enn  
betra.**